



L'inventader Reto Schmid cun sia pitschnina. MAD

La pli pitschna turta da nuscha dal mund

Ina novitad da la pasternaria da Sedrun

■ (anr/vi) Ella mesira be trais centimeters. Ma ella gusta exact sco la gronda. La pli pitschna turta da nuscha è da qui quest'emna sin fiera. Ils politichers en chasa federala han già sco emprims la quida da sagiar. Ins pudess sa chapescha dispartar: Èsi insumma anc ina turta? U stuess ins plitost dir crefli? Sch'ins vul esser sever e contempla sulet la dimensiun stuess ins forsa dir ch'i sa tractia d'in crefli. Ma sch'ins serra ils eglis e savura èsi chaussa clera: La pitschna delicatessa posseda la savur tipica da pasta dultscha e da nuschs – sco sia sora gronda, la turta da nuschs grischuna. Ed exact sco lezza gusta ella era.

Pitschna premiera en chasa federala

Nunusità è dentant il lieu nua ch'ins ha preschentà per l'emprima giada la pitschna spezialitad, numnadamain en chasa federala. Il glindesdi ha la gruppa parlamentara da la Svizra orientala envidà ad ina sairada. I ha dà musica appenzellaisa e spezialitads culinaricas sin set stans chantunals. En ils maguns dals politichers èn sa maschadads capuns grischuns cun mostbröcklis appenzellais e fischknusperlis dal Turgovia. Durant

mangiar han ins fatg in pau lobing per in'expo svizra a Son Gagl u simplamain baterlà da quai e tschai.

Al stan grischun han ins offrì vins dal Signuradi, suppa da giutta ed ils capuns obligats. La Pasternaria e Conditoria Schmid da Sedrun ha procurà per las dultscharias, tranter lezzas pia la pitschna turta da nuscha.

Experimentà dus onns

Reto Schmid maina la pasternaria tuatschina ed ha inventà la pitschna turta da nuschs. Dus onns ha el adina puspè empruvà co fabritgar questa delicatessa. «I n'è numnadamain betg uschè simpel», explitgescha il pasterner. «La turta è uschè pitschna e fina.» La finala ha el rabaglià nà ina pasta ch'è fina e zarta avunda, ma che tegna tuttina a mastrin las nuschs e na brischa betg en la chalira dal furnel.

Il pasterner ha già gudagnà pliras medaglias d'aur cun ses products. El occupa sur onns passa ventg collavuratur. Il november, cura ch'il café serra, produceschan ins mintgamai pacs cun dultscharias che fatschentas pon regalar da Nadal a la clientella.